

sich genommen hatte / so wirstu befinden / daß das solvens das angenommene Metall oder Mineral fallen läffet / vnd das ander / welches es lieber an greiffet / antasten vnd solviren wirdt. Von welcher præcipation im Vierdten Theil mehrers gehandelt soll werden.

Dieses aber ist noch allhier zu mercken / daß kein Metall solvirlicher ist vnter allen / als der Zinck / darumb sich auch alle andere / so wol im trucknen / als im nassen Weg darvon niederfallen / vnd in leichte Calces damit können gebracht werden / also / daß ein Calx Solis vel Lunæ auff solche Weiß ge fällt / (so man anders wol damit umbgehet) seinen Glanz behält / vnd gleich als ein zartes Pulver damit man auß der Feder schreiben kan / erfunden wird.

CAPUT LXV.

Einen subtilen Spiritum, vnd liebliches Oleum auß dem Zinck zu machen.

W Eilen ich allhier des Zinckes gedacht / finde ich gut / einen penetrirlichen Geist / vnd heilsames Oleum mit Essig darauß zu machen: Vnd geschicht solches also: Nimb die flores, welche im ersten Theil zu machen gelehret seyn / 1. Theil / vnd gieße in ein digerir Glas / 8. oder 10. Theil guten scharpffen Essig von Honig gemacht / darauß / vnd in Manglung dieses so nimb Weinessig / vnd setze